

Tag der älteren Generation

Piazzetta des Historischen Rathauses Köln

Mittwoch, 11. April 2018 – 14 bis 18 Uhr

Programm *

14:00 Uhr

Akkordeon-Orchester

14:10 Uhr

Bürgermeisterin Elfi Scho-Antwerpes

14:25 Uhr

Akkordeon-Orchester

14:35 Uhr

Vortrag SVK-Sprecherin

14:45 Uhr

De Büggel

15:00 Uhr

Prof. Dr. Ingo Froboese (Festredner)

15:15 bis 15:45 Uhr

Pause, Begehung der Stände, Kaffee, Kaltgetränke

15:45 Uhr

Markus Reinhardt Ensemble

16:15 Uhr

Rolly & Benjamin Brings **

16:40 Uhr

Polizei-Männerchor

17:00 Uhr

Ende des Bühnenprogramms

* Moderation: Elfi Steickmann

** Liedtexte auf Kölsch: siehe unten

Marieche

**Öm ding Auge kreise Stääne.
En dingem Hoor wonnt Sonnesching.
Du wells alle Deercher sääne
met Fingercher, su zaat un fing.
Met de Blömcher kanns du spreche,
jedes Vüjjelche verstonn;
wells, op Beje udder Breche,
morje en de Schull allt jonn.**

**Marieche, Marieche,
du bruchs doch nit ze kriesche.
Drei Jöhrcher nor –
un stripp-strapp-strull:
Dann darfs du en de Schull.**

**Du kanns dausend Leedcher singe,
schwadronere wie Frau Schmitz;
Kässjer höppe, Seilche springe,
luustere als wie ne Spitz.
Dausend Froge kanns du stelle,
op die kei Minsch en Antwoot kennt.
Ding Tröncher hell wie Pääle quelle,
wenn Pitterche noh'm Schüllche rennt.**

Marieche, Marieche (...)

**Dausendmol mich noch raseere.
Dausendmol noch kreis de Sonn.
Dausendmol noch Wödcher lihre,
dann darfs du en et Schüllche jonn.
Em Selverbäumche es e Ness,
dren litt en einzich jolde Ei.
Wann Vugel Rock jeschluffe es,
dann sin drei Jöhrcher wall vörbei.**

Marieche, Marieche (...)

© Text: Rolly Brings

© Musik + Arr.: Rolly & Benjamin Brings

Ibbendibbendapp

**E Levve lang jerödelt. Vill Schotter jemaat.
Jede Penning jeraaf. Op de huhe Kant jelaat.
Kniestich wie e Freese, froß hä singe Dress.
Aan d'r Raafjeer versteck. Jetz litt hä en d'r Kess.**

**Ibbendibbendapp: nevven d'r Kapp.
Eenemeenemutz: usjefutz.**

**Et Stina vun d'r Rennbahn hät niemols jewett.
Kei Nümmerche reskeet. Noch nit ens em Bett.
Hät immer jewaat op ne Prinz un si Päd.
Jetz wedde de Würm, wä d'r eeschte Stech määt.**

**Ibbendibbendapp: nevven d'r Kapp.
Eenemeenemutz: usjefutz.**

**Zijarette, Alk un Fraulück hät hä nie probeet.
Nor Rühkoss jefresse. Kackte selver op si Beet.
Beim Autobahnbesetze met dem Hollandrad
rammp hä ne Truck vum Ökomaat. Nä, wor dä Käl platt.**

**Ibbendibbendapp: nevven d'r Kapp.
Eenemeenemutz: usjefutz.**

**D'r Sänger vunner Kölsch-Bänd daach: „Ich ben d'r King.
Die hunderttausend Asis he beim Rock om Ring,
die drage mich op Häng!“ Hä sprung vun d'r Bünn.
Dä Gig wor am Engk. Dä Fleck wor jar nit schön.**

**Ibbendibbendapp: nevven d'r Kapp.
Eenemeenemutz: usjefutz.**

**Ne Aasch met Ohre fängk ze laabere aan.
Klopp Rassistespröch, dat mer et nit mih höre kann.
Hä liet keine Jeck elans: Dä Käl es bestuss.
Bei d'r nöchste Wahl, do striche ich in us.**

**Ibbendibbendapp: nevven d'r Kapp.
Eenemeenemutz: usjefutz.**

Nubbel-Danz

**Zick Wierfastelovend nit jepennt.
En Woch, die Dach un Naach nit kennt.
Ävver Diensdachsovends, do weed jeflennt.
Die Zick, die rennt: Die Lunt, die brennt.**

**Dem Herrjott dun de Ohre klinge:
Sechs Dag' un Nääch' kann Kölle singe,
des Ovends fiere, danze, springe –
un morjens dann de Botz nit finge.**

**Stöpp zo Stöpp un Äsch zo Äsch.
Die letzte Tüüt. Die letzte Fläsch.
Keine möde Cent mih en d'r Täsch.
Äschermettwoch steit d'r Fesch om Desch.**

**Diensdachsovends vör d'r Kneip op d'r Eck:
Ne Knubbel Minsche, "all blue 'n black".
D'r Nubbel brennt – jlich es hä verreck:
Wä he nit kriesch, es wirklich jeck.**

**Hey, Määdche, kumm un danz
bes Äschermettwochmorje.**

**Danz, sulang du danze kanns
bes Äschermettwochmorje.**

**Danz met meer dä Nubbel-Danz
bes Äschermettwochmorje.**

Maat et jot !

**X-mol troke Johre en et Land.
Wo blevv de Zick? Sei es uns fottjerannt.
Mer han jelovv, jeschannt, jeschwaad,
üch e paar Saache beijebrat
un hoffentlich nit zo vill falsch jemaat.**

**Freud un Leid, dat hatte mer jenoach:
männchmol Schneckekruffe, männchmol Vugelfloch.
Arbeit, Fiere, Nemme, Jevve;
Laache, Kriesche – dat es Levve:
E Stöck vum lange Wääch hadder jeschaff.**

**Maat et jot. Vill Jlöck op örem Wääch.
Ov de Zigge jot sin udder schlääch:
He op Äden fruh ze wääde, dat es ör Rääch.
Maat et jot. Vill Jlöck op örem Wääch.**

**Us klein Pänz woodte staatse Lück.
Es jestere vörbei? Es hück wirklich hück?
Mer wünsche üch e friedlich Morje
ohne Hass un zo vill Sorje
un jedem he e Stöck vun singem Draum,
un jedem Kind vun üch ne jröne Baum.**

Maat et jot. (...)

Rhing-Prumenad

**Wenn de Leuchröhre sirre
un de Naachfalder schwirre;
Rhingwelle munktele,
Huhhüüser schunkele
un ich prumeneer met dir –**

**wenn de Rhingbrögge schwinge
un die Stohlschinne singe;
Fäänzöch raddere,
Drecksduuve fladdere
un ich prumeneer met dir –**

**wenn de Mülltonne bröde
un ehr Tabu wall höde;
Ratte römjöcke,
de Stään' sich verdröcke,
jo, dann sääs du för mich:**

**Kumm, loss mer heimjonn, mi Hätz.
Süch ens, d'r Mond hält uns de Käüz.
Die Rhing-Prumenad, die es wall nett,
ävver ich well jetz en et Bett.**

**Wenn de Domtöön sich recke
un de Wasserspeier lecke;
Krützblome schweije,
Flossjeister steije,
jo, dann sääs du för mich:**

**Kumm, loss mer heimjonn, mi Hätz.
Süch ens, d'r Mond hält uns de Käüz.
Die Rhing-Prumenad, die es wall nett,
ävver ich well jetz en et Bett.**